

Mid-Day Dogri News Bulletin, 10th May 2025

समे — 12:25

<><><><><><>

Press Briefing

अज्ज नमीं दिल्ली च विदेश मंत्रालय ते रक्षा मंत्रालय दी सांझी प्रेस वार्ता च जानकारी दित्ती ऐ जे पाकिस्तानी फौज भारत दे पच्छमी बन्ने पर ड्रोन, लड़ाकू जहाज, लम्मी दूरी पर मार करने आले थेआरें कन्ने हमले करने दी उपरोतली कोश्ट करदा जा करदा ऐ। इस बारे जानकारी सांझा करदे होई सेना प्रवक्ता कर्नल सोफिया कुरेशी ते विंग कमांडर व्योमिका सिंह होरें आखेआ जे भारत पूरी तगड़ेयाई जिम्मेदारी कन्नै पाकिस्तान दिएं हिमाकतें दा बनकदा परता देआ'रदा ऐ। इस मौके पर विदेश सचिव विक्रम मिसरी होरें आखेआ जे पाकिस्तानी फौज केई झूठे दावे करियै झूठा प्रचार करै करदा ऐ। उनें आखेआ जे सिरसा ब्हाई केन्द्र गी नुक्सान पजाने दा ओहदा दावा सरासर झूठा ऐ।

<><><><><><>

Jammu Attack

तोआई रक्षा मंत्रालय नै बी जानकारी दित्ती ऐ जे पाकिस्तान नै अज्ज जम्मू शैहरे च बी केई महत्वपूर्ण थाहरें गी नशाना बनाने दी कोश्ट कीती ऐ जिंदे च स्पनगर स्थित मशहूर आप शंभू मंदर ते शैहरा दा इक होर रिहायशी इलाका बी शामिल ऐ। अज्ज पूरी रात पाकिस्तान दी तरफा रिहायशी इलाकें ते धार्मिक थाहरें गी नशाना बनाने लेई ड्रोन भेजे जंदे रेह जिंदे च ज्यादातर बी ब्हा च गै मारियै नकारा करी दित्ता गेआ। तोआई राजौरी कस्बे च पाकिस्तानी गोलागारी च अतिरिक्त जिला विकास कमीशनर राज कुमार थापा हुंदी मौत होई गेई ऐ। प्रधानमंत्री हुंदे दफ्तरे च राज्य मंत्री डॉ. जितेन्द्र सिंह, उपराज्यपाल मनोज सिन्हा ते मुख्यमंत्री उमर अब्दुल्ला होरें अधिकारी दी मौती पर डूहंगा दुख प्रगट कीता ऐ।

<><><><><><>

Day Drone Pakistan

भारतीय फौज नै जम्मू कश केई पाकिस्तानी चौकिएं ते आतंकवादिएं दे लाचिंग पैड नश्ट करी दित्ते न जित्थुआं ट्यूब लांच ड्रोन भारत च भेजे जा करदे हे। भारतीय फौज दा आखना ऐ जे अज्ज बडलै कोइ 5 क बजे अमृतसर, दे खासा कैंट दे उपपर दुश्मन दे थेआरें कन्नै लैस ड्रोन उड़डरदे दिक्खे गे। भारत दी ब्हाई सुरक्षा प्रणाली दी मदद कन्नै उनेंगी घेरियै तबाह करी दित्ता। इस्से दरानसीमा सुरक्षा बल बीएसएफ नै दस्सेआ ऐ जे कल रातीं 9 बजे पाकिस्तान नै बिजन उकसावे दे जम्मू सेक्टर च बीएसएफ दिएं चौकिएं गी नशाना बनादे होई गोलाबारी शुरू करी दित्ती जेहदे नी उत्थें तैनात साढे बलें ओहदा शैल बनकाइयै तगड़ा परता दित्ता जेहदे च पाकिस्तान रेंजर्स दिएं चौकिएं गी मता नुक्सान पुज्जा ऐ। जम्मू दे अखनूर सेक्टर च बनने पार सिआलकोट जिले हेठ पौंदे लूनी च आतंकवादिएं दे इक ठकाने गी पूरी चाल्ली तबाह करी दित्ता गेआ ऐ।

<><><><><><>

Drone Attack Foiled

भारतीय फौज नै पाकिस्तान कन्नै लगदे अंतर्राष्ट्रीय बन्ने ते नियंत्रण रेखा पर जम्मू कश्मीर दे बारामुला कोला लेइयै गुजरात दे भुज तगर 26 बक्ख-बक्ख थाहरें पर ड्रोन हमले गी नकाम करी दित्ता ऐ। इंदे च ओ ड्रोन बी शामिल न, जेह्दे रिहायशी इलाकें ते फौजी ठकाने लेई बी खतरा बनी सकदे हे। रक्षा सूत्रें मूजब इनें थाहरें च बारामुला, श्रीनगर, अवंतीपोरा, नगरोटा, जम्मू, फिरोजपुर, पठानकोट, फाजिल्का, लालगढ़, जैसलमेर, बाडमेर, भुज ते लखी नाला शामिल न।

<><><><><><>

Forces High Alert

भारतीय थेआरबंद बल पाकिस्तान दी तरफा ब्हाई हमले दिएं कोश्टें गी नकाम करने दे कन्नो कन्नी पूरी चाल्ली सौहगे ते सतर्क होइयै अपनी ड्यूटी अंजाम देआ करदे न। साढ़े ड्रोन रोधी सरिस्ते दी मदद कन्नै पाकिस्तान दे केई ड्रोन नकारा करी दित्ते गे न। बन्ने कन्नै लगदे इलाकें च रौहने आले लोकें गी घरे अंदर रौहने ते खामखा बाहर फराटी लाने कोला परहेज रखने लेई आखेआ ऐ। लोकें गी आखेआ गेआ ऐ जे ओ जरूरी एहतियात बरतन ते घाबबरन नेई। तोआई भारतीय ब्हाई फौज नै पीटीवी न्यूज़ पर चली दी उस खबर गी सिरे थमां खारज करी दित्ता ऐ जेह्दे च आखेआ जा'रदा ऐ जे पाकिस्तानीमिसाइल नै आदमपुर च भारत दी एस-400 ब्हाई रक्षा प्रणाली गी तबाह करी दित्ता ऐ।

<><><><><><>

Airport Closed

ब्हाई अड्डे सरबंधी भारतीय प्राधिकरण नै 15 मई तगर मुखे दे उत्तरी ते पच्छमी इलाकें च 32 ब्हाई अड्डे थमां डोआरियां आरजी तौरा पर बंद रखने दी घोशणा कीती ऐ। इनें ब्हाई अड्डें च अमृतसर, चंडीगढ़, जम्मू, श्रीनगर, भुज, जामनगर, जैसलमेर, पठानकोट, बगैरा शामिल न।

<><><><><><>

Media Advisory

सबबने मीडिया चैनलें ते डिजीटल प्लेटफार्मे ते सोशल मीडिया दा इस्तेमाल करने आले आम लोकें गी बी सलाह दित्ती जंदी ऐ जे ओ फौजी कारवाइएँ, सुरक्षा बलें दी आओजाई ते इस चाल्ली दिएं गतिविधिएं दे वीडियो गी शेर नेई करनकी जे इआं करने कन्नै महत्वपूर्ण अभियान प्रभावत होई सकदे न ते लोकें दी जान गी खतरा होई सकदा ऐ ते कारवाइएँ पर बी असर पेई सकदा ऐ।

<><><><><><>

Fact Check

पाकिस्तान दी कायराना हिमाकत पर भारत दे तगड़ेयाई आले परते दे बाद बन्ने दे दूई बक्खी थमां फैलाई जा;रदिएं गलत सूचनाएं च बाद्धा शुरू होई चुके दा ऐ। पाकिस्तान मीडिया आस्सेआ झूठे ते फर्जी वीडियो ते बदली दिएं तस्वीरें दा प्रसार कीता जा'रदा ऐ। लोकें गी आग्रह कीता जंदा ऐ जे ओह कुसै जानकारी दी तस्दीक करन ते कुसै बी संदिग्ध सामग्री दी रिपोर्ट पीआईबी फैक्ट चेक गी पीआईबी मोबाइल नंबर 8799711259 पर व्हाट्स ऐप दे राएं जां फही socialmedia@pib.gov.in पर ईमेल दे राएं देन।

<><><><><><>

Highway

जम्मू श्रीनगर राश्ट्रीय जरनैली शिड़के पर लौहकियां गडिडएं दी दऊं तरफा आओजाई जारी ऐ। ट्रैफिक पुलसै कल आखेआ हा जे मौसम साफ होने दी सूरतै च हौलिएं ते प्राइवेट गडिडएं दी जरनैली शिड़के पर जम्मू थमां घाटी ते घाटी थमां जम्मू आली बक्खी दोतरफा आओजाई दी इजाजत होग।

<><><><><><>